

四庫全書

集部

欽定四庫全書

集部

草堂雅集卷

六

詳校官中書臣丁榮祚

助教臣常循覆勘

總校官中書臣朱 鈐

校對官中書臣范 鑒

謄錄監生臣周 相

欽定四庫全書

草堂雅集卷六

元 顧瑛 編

陸德源

字靜遠吳郡人甫里先生之後好學博古尊敬師友雖貧贍力給謙恭若出諸生之下憤甫里之學不傳遂作甫里書院於城南撥良田以給學徒有司聞其事遂命其長是院後陞徽城教官以疾終

家有杞菊軒吳人稱為杞菊先生云

送薇紙昌園梅且索和

顧陸從來同里閨定交何必要通名  
桃花流水二三月  
著我扁舟聽雨聲

玉色疇能比硬黃  
酸辛敢擬出青房  
品題奕奕歸年少  
慚愧華顛作漫郎

玉山謝紙曰蜀郡金花新著樣  
剡溪玉版舊齊名  
荷君寄我黔川雪  
猶帶漣漪瀉月聲

又謝蜜梅曰江南烟雨未全黃誰使青酸墮蜜  
房娥媚已能知魏證典刑時復見中郎

和題新安梅花次韻

東風一夜渡江新開徧梅花照眼勻何遜從來有才思  
題詩不待廣陵春

送陳敬初秀才北上

江南八月鴻雁飛故人挾策游京師為郎作簿雖可期  
老懷與爾寧分違憶昨同舟風雨夕胥江委蛇巖灘白

紫陽之山千里隔何曾笑我微官斥歸來吳城又半年  
攬袂結佩仍周旋陳膠漆非偶然拍肩笑語忘其顛  
秋風蕭蕭吹去舟征衣蓐食還依劉芙蓉照波生遠愁  
欲別未別難為留玉堂金闕有耆舊草詔細書當在手  
乘時薦剡如轉丸兀兀兔園非所守子之行兮良不苟  
張舜咨

宇師夔錢塘人由行省宣使調休寧簿居官有能  
稱政事之暇焚香閉閣哦詩對卷脩然無塵想修

潔可知也

送子庭栢上人東歸

賀公吳語尚清狂  
上疏黃冠乞故鄉  
栢也東歸何所有  
畫圖詩卷滿奚囊

寄玉山索蘭花

許我猗蘭葉有光  
報君墨竹節尤蒼  
秋期坐對文峯下  
清閨幽香道味長

題竹四首

萬里高風不自由  
琅玕掀舞一天秋  
何人笙鶴歸來晚  
縹緲仙城十二樓

右風

雨重簷簷翠實寒  
檉陰野色與檀欒  
結根牙谷專清閤  
似厭人間道路難

右雨

土地肥磽自不齊  
蒼岩瘦石故相宜  
繁華坐見成秋苑  
獨立空山閉歲時



右老

苔綠生香石有文  
駢頭下見錦綳孫  
夢中彷彿東橋路  
沽酒人家小角門

右嫩

次李士廉韻東玉山

書樓斐几石嶄然  
晴雪飛來太華顛  
墨本秘函枯樹賦  
牙籤挿架白雲篇  
清心求友先同調  
華髮逢人耻問年  
共惜分陰珍雅翫  
封侯擬不到鵞肩

用韻寫栢子庭卷

之子庭前栢含暉蓄景光託根當太白何口得雌黃大道從行食深禪坐亦忘自憐塵鞅客擾擾自蜂房

玉山詩曰虛舟元不繫湖海至今稱悟得庭前栢方為物外僧空空無我相落落有誰應肯向東山住東山氣倍增

明海歌贈寶明海

大明麗天雲海空搏桑倒景三韓東八紘磅礴俯仰內

萬境膏沐鴻濛中梵宮高標跨溟渤  
嶺香絕烟霏濛時時雲氣超羣龍  
龍君夜出流光從道人深禪入水觀  
要探衆寶馮夷宮手書貝葉映金碧  
身翳雨花紛翠紅君不見俗緣千劫  
塵網蒙鏡象不離生龜筒又如磨牛  
履陳迹究竟彼岸無終窮人心至善  
與冥通尚需法語開盲聾便從穴紙  
逃痴蜂冷然空飛御天風

寄廣西白

歸思迢迢不奈何寄聲珍重病維摩  
風帆明日春江上

回首蒼山綠樹多

題新安方丈梅花

新安堂上梅花新  
南枝北枝開未勻  
渠儂切莫訝渠瘦  
中藏萬斛江南春

熊夢祥

字自得江西人  
博讀羣書旁通音律  
能作數體書  
乘興寫山水尤清古  
無庸工俗狀以茂才  
舉教官  
不樂拘制輒棄去  
以詩酒放浪淮浙間  
卜居婁江

上扁得月樓與予為忘年交曠達之士也號松雲道人

題管夫人竹

夫人寫竹何縱橫錯刀離離光怪生安得月明招白鳳玉闌西畔聽秋聲

題二色芙蓉便面

曾障西風十二闌亭亭醉醒碧波寒月邊青鳥無消息  
流落人間作畫看

題趙子昂蘭石

汎晴湍兮潺湲乘芳馨兮嬋娟望九疑兮眇眇思公子兮未敢言

趙翰林桃花馬圖

風翻細雨入天閑貌得權奇電影寒鳳閣春深人已遠  
空餘精彩匹曹韓

題李息齋竹

蘄丘道人寫瀟洒烟寒兔齒石蒼蒼素娥剪翠雲葉亂

三十六陂春水香

題邊伯京畫盤松圖

居震宮受秦封乘元氣超穹窿又何獨羨夫梁棟之質  
莫測夫神奇變化之功夫然後知其為龍松

題柏子庭枯木

鐵珊瑚樹飛鬼蝶王子漱鳥不許躡乞與海神神不收  
湧樹雪晴光煜煜何人潑墨淡復濃使我一見成心獵  
便令退從未畫前無孔笛中宮徵叶

題張叔厚描琵琶士女

剪燭填詞明皓齒是非恩愛從茲始莫將貶竄立人倫  
世上伊誰魯男子

題畫山礬

傍路依山到處生只因樵牧慣相輕若教塵俗如桃李  
未必梅花肯作兄

題王元章梅

紫禁春醲雪未消年年香冷只飄飄許身入畫酬清賞



不嫁東風過小橋

客懷奉東玉山

我昔離家七月強只今十月隕清霜可慚濁酒黃花興  
應悔青銍白髮長翠袖天寒修竹暗綺窓日暖碧茸香  
夜長枕上揚州夢江北江南是故鄉

玉山戲答詩曰秋水藍橋一尺強愁聞玉杵搗  
玄霜東籬老子烏紗薄西郭佳人翠袖長古寺  
竹深禪榻靜晴窓花落研池香西風鶴背三更

夢笑看瑤花作醉鄉

題王元章畫梅花

水影清光為寫神當時已是失天真一從殘角吹新曲  
幾向寒谿覓故人綈袂歸來猶有月佩環飛去更無塵  
莫言醉魄空離落信把和羹屬大臣

趙奕

字仲光吳興人魏國文敏公仲子作詩為文翰墨  
游藝皆有家法尤好古雅不事進取與予特友善

相去雖數百里必一月一致書其天質秀雅如芝  
蘭玉樹王謝佳子弟也

玉山與郗九成自姑蘇來吳興僧可傳邀予陪游  
弁山之黃龍洞時有紫霞同席遂分韻得花字

盤屈度磻礧歛嶮復豁舒龍居潛石洞花暖集蜂衙峭  
壁生蒼蘚清泉長赤砂松濤響雲壑竹翠滴桃花杖履  
丹梯險籃輿綠磴遮攀藤嘯猿狖並草卧麝麋絕頂望  
笠澤傾溟想女媧遙天連島嶼遠水接蒹葭道士來邀

坐仙童為煮茶林深多虎跡地僻少人家對景詩情逸  
尋芝道氣遐幽塵不到境勝興無涯堪種茅山朮宜  
栽邵圃瓜寶書傳正法靈劍挂青蛇逕滑崎尤峻苔  
荒突又窪淙淙流暗澗聒聒聞鳴蛙下嶺日欲落登舟  
路更賒平田飛白鷺別墅宿歸鵲犬吠柴門近鵲啼野  
樹斜菜畦黃撲撲麥隴碧交加老態慵登涉衰形獨嘆  
嗟山翁荷鋤鍾村婦倚籬笆駐舫携紅袖停杯挾紫霞  
金爐薰薦褥玉手弄琵琶鑿落傾香釀玻璃揀艷葩歌

姬聲縹緲醉客笑諠譁  
擊柝城將閉吹笳鼓尚撾  
卷簾風滅燭濕幔雨垂麻  
今日雖云樂他年還共誇  
更闌歸去速燈影照龍紗

雨窓寫懷

幽窓談笑話平生三十年間幾度更  
白髮滿頭今已老  
青山排闥故多情桃花灼灼應無語  
春雨蕭蕭尚未晴  
明日扁舟携好酒南村筍蕨正堪烹

春日書懷

忙裏過韶華東風日易斜黃梁應未熟白酒尚堪賒蝶  
魄迷幽夢蛛絲絆落花百年能有幾隨分度生涯

送聞梅澗住弁山祥應宮

石磴懸崖人跡稀林深地僻絕塵機井邊丹竈千年冷  
窓外山雲盡日飛老虎每來廊下走黃龍常向洞中歸  
先生有道開門坐松響瑤笙月滿衣

倪瓚

字元鎮毘陵人酷好讀書尊師重友操履修潔詩

趣淡雅如韋蘇州作小山水如高房山自號經鋤  
隱者家有雲林隱居與予有葭莩之親累辱見招  
規往而每不果然多得其所作故并刻云

聽袁子方彈琴

蕙帳凝夕清高堂流月明芳琴發綺席列坐散煩纓回  
翔別鵲意縹緲孤鸞鳴一寫冰霜操掩抑寄餘情

送別甘允從

來從墨沼雲林下共愛女蘿緣石牀喚人鸚鵡語猶澁

當戶枇杷子半黃奉橘定應題百顆籠鵝即欲寫千行  
蘭亭書法人間少好去山陰汎野航

奉懷張外史

陰壑慘慘綠苔生碧雲亭亭多遠情松杉鶴去轉蕭瑟  
洲渚花落自縱橫從君下榻住十日看我鼓枻出層城  
洞口菌巢無恙否定應閉閣著書成

次韻陸天錫寄張外史

谷口路微山木合濕衣空翠不曾晴飢援攀檻為人立



寒犬號林如豹聲，小閣秋深聽雨卧。  
長空日出采芝行，道心得失已無夢。  
沐髮朝真候五更。

題所畫喬林礪石

山家日出無行蹤，雲林烟蘿遠且重。  
不見鹿眠盤石上，捉壺自挂一長松。

題柯敬仲竹書達兼善秘書後

誰能寫竹復盡善，高趙之前文與蘇。  
簡韻蕭蕭人品係，篆籀渾渾書法俱。  
奎章博士生最晚，耽詩愛畫同所趨。

興來揮洒出新意孰謂高趙先乎吾

達秘書曰堤柳拂烟踈翠葉池蓮過雨落紅衣  
娟娟唯有窓前竹長是清陰伴夕暉又梁王宅  
裏參差見山簡池邊爛漫栽記得九霄秋月上  
滿庭清影覆蒼苔

題所畫雲林小景圖

赤城霞暖神芝秀洞裏桃花不記春何事却將山水脚  
鍾陵市上踏紅塵

馮文仲自玉山來携向畫雲林小景圖復求題詩  
因用前韻

憶昔舟歸雪浦濱松陵瑤草欲生春閒拈逸筆圖清思  
今日披圖似隔塵

題自畫竹

東海有癡夫自稱繆且迂書壁寫絹楮豈其狂之餘

寄懷鄭徵士

谷口子真今最賢久別鬱鬱夢相牽好營秫田多釀酒

金方口人全三  
卷六  
欲買茆屋尚無錢  
兄病每書賒藥券  
客來唯候煮茶烟  
闔閭城東有艇子  
憶爾青燈相對眠

賦句曲外史精舍書在虞伯生張仲舉後

道士朝乘白鶴還  
樓臺金碧鎖空山  
半天花雨飛幢節  
萬壑松風雜珮環  
丹井夜寒光剌剌  
石壇春靜蘚斑斑  
飄然便擬從君隱  
分我玄洲一半閒

伯生詩曰隱居聞道無人跡  
麋鹿來依積雪深  
每占雲氣得芝朮  
莫怪丹光穿樹林  
茅君自騎

一虎下木客或與羣猿吟知爾此時最相憶想  
予飛矯度千岑

仲舉詩曰玄洲別塢鬱龍庭滿谷蜷雲養萬松  
外史編圖金匱鑰隱居留誥玉泥封丹池雨現  
龍無角瑤草春肥鹿有茸擬借一龕為洞吏與  
君來往大茅峯

次韻郊九成見寄

郭外青山舊結廬微茫野迳望中無殘生竟把烟霞癖

好事猶傳海岳圖  
夜壁松風懸雅樂  
秋池菊水酌商飮  
倘從世外求玄賞  
好趁輕舟看浴鳧

送徐元度還江西

悠悠西江水  
縣縣江上山  
借問離羣鶴  
孤飛幾時還  
白雪亦忌潔  
青雲安可攀  
時時王子晉  
吹笙向人間

九日登華氏溪亭

茱萸黃菊稍斑斑  
野水寒烟蒼莽間  
送客歸來逢九日  
華家亭上獨看山

吾友陸友仁甫舊得古銅印一紐以示予辨其文  
曰陸定之印以名其子而字之曰仲安友仁既歿  
仲安求為賦焉

吾友友仁甫覽古閔世盲示我古印章始得自幽并辨  
之曰定之釋義為爾名既名字曰安勗哉在敬誠友仁  
今則亡緬懷涕沾纓繫昔黃太史結交漢米生手持玉  
刺文螭紐交縱橫上有元暉字印刻與弗輕殷勤字其  
兒祖武冀可繩允以學業懋繼述暉芳英書比二王跡

價重十連城高躅思仰止景行爾其行

張心遠訪郊九成因書以寄

州府今為掾風埃多厚顏香芹渾滿磧去鶴未巢山思  
逐春雲亂心隨野水閒張君應話我樗散碧巖間

為馮丈仲畫山水小幅

知君近住西湖曲湖水淪漣似輞川窓下青松高百尺  
時時落雪滿琴絃

題曲江洗馬圖



校獵上林苑洗馬昆明池霜威肅笳鼓雲氣畫車旗馬  
班陳賦頌衛霍綏蠻夷王風既未遠文明方在茲逶迤  
霄漢上鳳皇尚來儀

賦居延王孫德新小隱軒

志隱寧須分小大不論城市與山林橘中之樂固不減  
洞裏有春藏更深奕戲自能忘世事酒尊聊用散冲襟  
傳說巖築苟無遇豈有朝堂論道心

題水仙

曉夢盈盈湘水春  
翠虬白鳳照江濱  
香魂莫逐冷風散  
擬學黃初賦洛神

蘇臺懷古

望中烟草古長洲  
不見當時麋鹿游  
滿目越來溪上水  
流將春夢過杭州

送甘允從

翔鴻縱高安流水  
去不息枉道別友生  
揚舲望京國  
婉孌前途愁蕭條  
餘景匿神京  
衣冠會左右  
金張宅驅馬

流星繁乘軒春霧集嘉子玉質朗早通金閨籍行逢明  
主顧入補詞臣職束帶向晨趨陪燕終日昃芳年易為  
晚所願崇令德英英白雲飛渺渺青山隔秋風應節起  
萬里思親客游子返舊居銜枚數相覲

再用歸字韻寄張貞居柳太常鄭明德

華陽外史從幽討谷內高人亦賦歸遙憶愚溪對山坐  
何時菌閣看鴻飛荒荒旭日晡玄髮滴滴流泉浣素衣  
寂寞松窓懸榻處塵生麈尾不堪揮

送元度北游

荷鍾空林春雨餘  
艤舟沙岸燕飛初  
去尋天上仙人珮  
肯顧山中隱者居  
霜月四更提劍舞  
田園二頃帶經鋤  
蘭榮柳密南簷下  
佇子雲間枉尺書

送章鍊師游七閩

高士不羈如野鶴  
忽思閩海重經過  
舟前春水他鄉遠  
雪後晴山何處多  
鰈鮓卧雲芳草細  
鉤輅啼樹野烟和  
武夷九曲最清絕  
落日采蘋聞棹歌

再和虞道園題劉宗師畫像

焚香坐石孤峯月飛珮朝天萬壑風  
邈爾空歌傳碧落飄然流響振金宮  
神君降服少霜劑聖主能延綠髮翁  
共道乘鸞去無迹祥雲繚繞畫圖中

九日

自笑不能孤九日一壺濁酒對西山  
遙憐玉樹秋風裏靜看冥鴻落日間  
草木蕭蕭雲更碧山川漠漠鳥飛還  
長途誰是陶彭澤被褐行吟意自閒

鄭遂昌隱居梁鴻山以詩寄之

伯鸞近在東山陞室無孟光唯兩兒草堂貧煩王錄事  
蓮社緣依遠法師迎我掃除松下雪因君起寫壁間詩  
便知從此遂真隱深谷紫芝堪療飢

林下遣興

眼見藤梢已過牆手拈書卷復堆牀聊因水檻親魚鳥  
欲出柴局畏虎狼冠製不嫌龜殼小衣裙新剪鶴翎長  
從來任拙唯踈放一月秋陰不下堂

賦謝陸繼之紫蠟黃柑之貺

吳郡舟中

闔閭城外皆秋水，斜日維舟方醉眠。  
攜手故人驚夢裏，送書飛雁落尊前。  
黃柑開裏煩相贈，紫蟹傾筐也可憐。  
憶爾獨居湖上宅，晴窗奇石畫生烟。

首夏即興呈貞居

鶯鴨如雲散碧陂，來禽青李壓低枝。  
深林汲澗常聞虎，清晝焚香獨下帷。  
路出城東無十里，燕來堂下不多時。  
可憐稚笋都成竹，忽見春蠶已吐絲。

春日贈張茂實

久客東海上秋風吹練裙  
放言愛莊叟笑癖如陸雲  
採藥清晨出哦詩靜夜聞  
滄浪可濯足吾與爾為羣

悼宋高士

秋日高人逝微霜蕙草摧  
鷺羣空碧沼鶴影自層臺  
應馭冷風出疑隨密霧來  
松杉暮蕭瑟撫事有餘哀

十月十三日蕭閒館夜坐

隱几忽不寐竹露下泠泠  
青鎗澹斜月薄帷張寒廳  
躁



煩息中動希靜無外矚窅然去虛際誰知有身形

曲彥遠寄茗裹賦此道謝且求致梨栗木瓜

繞屋青山謝朓居木瓜梨栗種扶踈不妨暇日騎官馬  
自喜清時少簿書九月授衣霜欲落百年回首雁初飛  
猶憐踽踽空山客茗裹封題遠慰予

寄段吉甫

昔年段干木踰垣避其君冥翳不可干清風扇炎氛德  
縣百世下吉甫賢且文神鸞養奇采芳芷結幽芬回視

當世士雞鷩政紛紜區區事夸奪子獨志不羣舍瑟作而嘆此道誰復云

章鍊師由蘇州訪鄭有道而歸

良覲忽云阻桐花今亦繁落日滿泗渚揚舲念孤騫因懷息機叟蘊真從灌園晨拂石上雲佇子接清言

送高侯之秦郵

秦漢置牧守猶古之侯伯封建而郡縣仁政固不易漢宣知所本留意二千石慎哉高侯車願循古轍跡

惻惻行 并序

三月十五日陸元素將從梁鴻山歸吳淞之上是夕坐至夜  
分始別予入舟賦此追至梁鴻山寄之以定及冬重來之約  
惻惻復惻惻幽思從中發感子遠來訪畏子遽言別不  
有同心人何以慰孤寂矧茲夏春交蕭艾盈路側江水  
亦浩漾風雨還飄突行將阻揚手轉覺意忽忽交好匪  
在今高誼敦自昔人生寧無別所悲歲時易坐嘆辛夷  
紫還傷蕙草碧僕夫竊相告怪我悲憤塞山中梁鴻棲

江上陸機宅井臼今蕪穢鶴唳且寂寞子徃經其壩徘徊但陳迹天地真旅舍身世等行客汎汎何所損皎皎奚自益修短諒同歸數面聊歡懌

送李徵君過荆溪訪王司水

何處尋狂客故人王子猷花落庭前樹風吹溪上舟紫筍生春雨綠蘋滿芳洲心隨酒船發悵望不能休

李徵君將還揚州因言沈郎官在吳下賦此以寄  
二月桃始花淮南客還家階前踈雨落堂上春衣薄為

言沈約在吳中玉壺青絲酒如空春風相過蕙草綠芳  
菲滿堂樂未終

醉歌行次韻答李徵君春日過草堂賦贈一首

杜陵昔年有茆屋浣花溪邊錦江曲古人不見春風來  
桃李無言自山麓石牀蘚滿青泥乾決渠流水夜潺湲  
可憐寶劍埋黃土空餘山月照波間今我不樂空懷古  
短世長年誰比數花下那知李白米山鳥悲歌童亦舞  
酒酣大笑五情熱作相形求築巖說吳齊相逝居首陽

逍遙采薇飽芳潔勿歌虞夏神農詩賢愚等是百年期  
魯連耻秦亦蹈海笑爾局促商山芝少文壁間對圖畫  
莫待老來難命駕仰看翕忽浮雲馳安得乘螭與之化  
漠漠楊花縈遠天迸壑晴雷驚醉眠李侯神爽色不動  
手中茶雪落輕烟逢君此樂誠草草便欲携君赴烟島  
海上千年白鶴飛世人胡為空自老

玉壺中挿瑞香水仙梅花戲咏一首

寒梅標素豔幽卉弄妍姿團團紫綺樹共耀青陽時折

英欲遺遠但恐傷華滋置之玉壺冰芳馨消歇遲

雪中折枇杷花寄吳處士一首

雪中自折枇杷花走寄城南處士家明朝雪晴定相顧  
兩株松下煮春茶

擬陰常侍一首奉寄到秘監趙員外

幽并游俠地都城百雉連河漢瞻疑近雲鳧信是仙樓  
分霞欲曙花將月共妍  
擣毫傾藻思獻賦足為傳還知  
跨烏鵲夜宿綵雲邊

金史卷六  
卷六  
秋夜賦

清漏下數刻疎鐘仍獨聞  
零露溥夕影端居澄俗氛恬  
淡斯寡欲榮名非所欣  
樂哉咏王風忘年栖白雲

秋答寅夫對雨見懷

溽雲變陰晦零雨隨風濤  
的皪集蓮沼飄飄灑蘭皋  
朱絲緩瑤瑟綠錢生寶刀  
撫事生慷慨端居倦游遨  
處世每慚抑懷人徒詠陶  
脫質愛靈藥閒情宣弱毫

古意一首次韻答曹德昭



齊王好竽客鼓瑟操瑟何以干齊門古人結友多豪傑  
況爾封君之子孫王國陳詩終大雅楚俗尚鬼悲招魂  
相思日暮不可見鴻飛冥冥目力昏

雲槎軒

已比溝中斷空思海上浮隨雲秋汎汎貫月夜悠悠無  
路通河漢憑誰問女牛漂搖非有待吾道付滄洲

題陳氏齋壁

愛爾菲齋少塵雜時來下帷清晝眠風流政思書裙去

懶惰惟知坦腹便林間病鶴尚俛啄池上山雞徒自憐  
何為當年種桃者移家偶脫區中緣

悼頂山寺清上人二首

幽曠山中樂飄飄物外蹤梵餘閒憩石定起獨哦松花  
落春衣靜雲垂磴戶重依依種蓮處林暝只聞鐘

杯渡前溪見水源偶來佩芷服蘭蓀香臺猶帶山窓影  
經卷長依松樹根雲起晴峯還有觸雪消春野不留痕  
倏然我已忘言說翠竹黃花自滿園

送張伯雨還山

日暮書傳青鳥使，華林瑤草待君歸。  
挾舟蜿蜒雙龍出，背雨寥寥一鶴飛。  
秋水琢成蒼玉佩，朝霞補作紫烟衣。  
山中長吏來相覓，應借窻間白羽揮。

雪後謁陳子真

陶公卜宅南村裏，快雪初晴思一游。  
樹辨微茫來獨鶴，櫓搖欹側散輕鷗。  
墨池繞甍春水滿，塵榻繡書夕照收。  
相見惘然如有失，掉頭吟咏出林丘。

晨起一首寄丹丘

竹窓晨起聞幽鳥深巷絕無車馬喧多病馬卿非不過  
歸田陶令自忘言墻陰薯蕷苗方茁雨裏櫻桃花正繁  
二月陰寒少晴日坐看秋水上柴門

雨後

雨後循除泉亂流落花時節綠陰稠石尊貯酒供杯飲  
素壁圖山入卧游翳日長林藏伏虎際天春水浴輕鷗  
幽棲四月饒櫻筍醉裏題詩一散愁

寄王叔明

幾夢山陰王右軍筆精墨妙最能文  
每將竹影模秋月更愛山居寫白雲  
秘笈封題饒古迹雅懷蕭散逸人羣  
今年七夕聞多事曝畫緒書到夕曛

寄吳孟思并懷張外史

江海風流吳孟思十年不見鬢成絲  
舊同野老松花供今寄仙君石室碑  
秋日滿船初晒藥晴雲浮水獨臨池  
南山樹裏孤栖鶴爾去何當一問之

送劉彥文為浙西憲司掾并簡貞居

落日采蘋溪水綠  
目追帆影先飛鴻  
寄書為覓仙人隱  
種杏久居丹井東  
遠道悠悠宵入夢  
晴波洶洶晝多風  
鳴珂使者清無事  
爾得優游羣掾中

八月十八日蕭閒道館聽袁南宮彈琴是日風雨  
蕭然有感而作

玉琴轉清亮  
風雨更飄飄  
踈桐蔭高館  
朱槿耀芳條  
生  
物  
曷  
可  
遏  
撫  
事  
發  
長  
謠  
弱  
齡  
陪  
清  
燕  
循  
髮  
想  
垂  
髻  
相  
見

日已老離居夢且遙秋江渺雲水去鶴影搖搖

余與元鎮初識時元鎮始弱冠余年六十今余年八十有六而元鎮四十餘矣蕭閒館東齋庭下向見盛鍊師手種二桐忽已十五年今桐陰可蔽十車地因誦桓司馬樹猶如此人何以堪之語元鎮復賦此詩相與諷詠為之泫然袁矩書

寄王叔明

能詩何水部愛石米南宮允矣英才最居然外祖風釣  
絲烟霧裏船影畫圖中他日千金積陶朱衍偶同

題米南宮石刻遺像

南宮遺像刻堅珉猶在荒城野水濱絕嘆莓苔迷慘淡  
細看風骨尚嶙峋山中仙塚芝應長海內清詩語最新  
地僻無人打碑賣每懷英爽一傷神

寄張貞居

不但入城蹤跡少南林野老見猶稀狂歌鳴鳳聊自慰



舊學屠龍良已非蒼蘚渾封麋鹿逕白雲新補薜蘿衣  
羊君筆札誰能寄欲讀靈文一叩扉

過薩判官齋聽其鼓琴

薩公能琴賢且文城闔一過何懽欣高堂掃榻新雨霽  
為鼓瀟湘之水雲竹林蕭瑟風嫋嫋山日晦靄波汙汙  
曲終推琴意愈淡忍即別去隨飛蚊

戲題嚴錄事所集書畫數

雨館晝逢嚴錄事手持書畫索題詩金題玉躐齊梁跡

墓刻石鐫秦漢碑把玩始驚繁卷軸品量還愧拙言辭  
古人冷淡今誰尚漫葺殘編慰所思

薩仲明為丞相府掾時僦居京師其軒曰半野後  
買宅延陵亦揭是名於軒因雨宿其下遂為賦詩  
云

何意開軒名半野身存魏闕思江湖斜侵瓜圃通花藥  
稍傍薇垣近竹梧千里秋風催斫鱸九霄晨露浥飛鳬  
如今別買荒城宅自掃風林候野夫

十一月二十三日率性德源共載過林下而予適不在遂返棹竟還明日詩來因次韻重邀之

雲林風雪興不孤指顧可求塗豈迂兩忘主賓政自好  
一以禮法何其拘我方飄忽念歲月子乃踈豁笑人奴  
再為理棹急相就放筆為寫狂游圖

次韻德源率性所賦十二月四日雪

海宇希微隱一毫行舟冰膠夕停篙愁看寂寂雙峯並  
細數紛紛亂石高豈有風塵勞白羽謾思文采照宮袍

雪融二月溪流合洞口誰尋千樹桃

餘不溪辭

餘不溪水涵綠蘋微風吹波蹙龍鱗看山蕩桡不知遠  
兩岸桃花飛接人溪回路轉松風急竹林華房霞氣濕  
忽逢道士頎而長疑是韓國張子房相期飄拂紫烟裏  
下攬滄溟浮玉觴

義興吳國良用桐烟製墨黑而有光皴膠法又得  
其傳將游吳中售諸隱君輒賦詩速其行云

生住荆溪上桐花收紫烟墨成羣玉秘囊售百金傳孰  
謂奚珪勝徒稱潘谷仙老松端愧汝桐法更清妍

聽秋軒

聽秋軒裏聽秋雨定起山僧坐翠微隱隱烟濤搖夜席  
濛濛花雨著人衣驟如崖瀑衝雲落宛似湘波鼓瑟希  
六用根塵今已淨松篁陰下共香霏

友人期過寺中不至

山寺擁鑪夜風聲如怒濤獨吟何水部還思王騎曹曠

達予所羨阻別心增勞來茲慰幽寂輕舟可即操

贈天寧寺福上人

荆溪霜落後銅官日出初自榔頭上髮更理篋中書上人從定出詠言方繞除邂逅發微笑幻身同太虛

李文遠製墨以贈吳寅甫次韻

潘衡墨法老坡傳承晏相承又幾年獨依山室燒桐子贈與仙人寫內篇石竈霞光存活火夜帷雲影泣清烟要知文字遺不朽猶向詩中咏墨仙

奉題曹文貞公墓道奉先亭

奉先亭子山之陰雲氣低徊何處尋  
烏啼隧道風林靜  
蘇利龜趺雨後深  
故老猶言前日事  
鯁生漫感二毛侵  
河山流峙英靈在世事紛紛一短吟

曹文穆公既歿韓伯高叅政為其子買宅京口

清貧我早識尚書身後韓公為結廬  
可使家聲今不替  
也趨禁直未全踈  
憲臨墨沼揚雄宅  
郭映雲林謝朓居  
共愛諸郎游息地  
風雩閒詠暮春初

十二月七日與季堅與之夜坐走筆書贈與之

僧扉共卧風雨夕岳生清真何太顛持家有弟足自慰  
沽酒無錢殊可憐梅蕊衝寒欲放白燈花惱人故生妍  
孰知旅枕作孤夢周處祠前行買船

游善權寺冒雪還重居東院

來窺善權洞一上李公樓水堦簾前引雲旌松際浮燃  
燈長不夜垂釣只虛舟欲讀吳朝刻真成冒雪游

十七日過與之洛澗山莊留宿復大雪作及明起



視戶外岩岫如玉琢  
削竹樹壓倒逕無行蹤  
飄瞥  
竟日至暮未已雪深尺餘  
賦詩留別

世途縈往再歲晏不知歸  
密雪竹林夜挑燈共掩扉  
稍移神慮靜高咏玄言微  
遇此岩中賞初心悵多違

贈墨生

岩谷春風起桐花落  
澗紅隔水輕烟發  
收煤石竈中豹  
囊秘玄玉鸞池生白虹  
湯生法潘谷千載事同風

次韻重居寺柯博士壁間舊題

至正  
辛卯

初月五日春意動遠水蕩漾晴如何鏡中羞見白髮短  
柳上愁看青眼多起拂綠琴歌楚調為留明月掛松蘿  
弭棹溪南一杯酒他年浪跡倘重歌

題曹僉事畫溪山春霽圖

荆溪之水清漣漪溪上晴嵐紫翠圍連舸載書烟渚泊  
提壺入林春巖肥身遠雲霄作幽夢手栽花竹映山扉  
磯頭雪影多鷗鷺也著狂夫一浣衣

示友人

子處窮愁際我居憂患中貪殘墮鬼國喜怒屬狙公莫  
笑淮陰俛誰同鮑叔風雪汀留雁跡飛舞任西東

至正十年十月二十三日予以事來荆溪重居寺  
主邀予寓其寺之東院凡四閱月待遇如一日予  
歸命大覺懺除垢業使悉清淨乃為寫寺南山畫  
已因畫說偈

我行域中求理勝最遺其愛憎出乎内外去來住止夫  
豈有碍依桑或宿御風亦邁雲行水流遊戲自在乃幻

岩居在於室內照胸中山歷歷不昧如波底月光燭眇  
昧如鏡中燈是火非給根塵未淨自相翳蔽耳目所移  
有若盲瞶心想之微蟻穴隄潰輒然一笑了此幻界

為方厓上人畫山就題

摩詰畫山時見山不見畫松雪自纏絡飛鳥亦閒暇我  
初學揮染見物一似癡郊行及城游物物歸畫筭為問  
方厓師孰假孰為真墨池浥涓滴寓我無邊春

初書記以詩來別且諄諄開諭深見方外之情因

走筆次韻奉謝并期面別

但知四大皆假合順境逆途非樂憂夢中妄想驚得鹿  
海上忘機思狎鷗舉世何人到彼岸獨君知我似虛舟  
詩來說法能開諭頑礦無情也點頭

題方厓墨蘭

蕭散重居寺春風蕙草生幽林蒼蘚地綠葉紫瑤莖早  
悟聞思入終由幻化成虛空描不盡明月照敷榮

題方厓臨水蘭

蘭生幽谷中倒影還自照無人作妍暖春風發微笑

二月二十四日潘子素王叔明來慰藉臨別為寫

水傍樹林圖并賦詩

積雨開新霽汀洲生綠蘋臨流望遠岫歸思忽如雲

絕句三首

秋水清空似泛槎此生汨沒似無涯蕭閒堂上收書坐

八月芙蓉始著花

芙蓉花下坐鳴琴疑在瀟湘斑竹林翠節霓旌烟雨濕

秋來江水不知深

岳王孫子最清顛  
袁老彈琴和澗泉  
一簣松肪初釀得  
賸將醉爾竹林前

鄭明德新居

僦居吳市仍栽竹  
掛榻高齋獨待予  
風引香烟金鵲尾  
雨添書水玉蟾蜍  
仲舉未應治一室  
更生何用博羣書  
繞牀阿堵那嫌俗  
每鑿金錢一飯餘

潘純

字子素淮西人世儒業博學通古今善談笑作詩  
為文迥出流輩壯游京師名公大人無不與交晚  
居淮浙間名重一時云

題周公瑾墓

伯符早世將軍死鄴下羣臣賀魏公石馬荒涼眠道左  
紫髯倉卒帝江東二喬信是傾城色甲第空規建業宮  
百尺孤墳蓋春草遠林寒食紙錢風

山行即事



石子路三叉居人八九家綠分鄰寺竹紅出矮牆花野  
老能娛客山泉自煮茶茜裙誰氏子赤脚髻雙丫

題岳武穆王墳二首

海門寒日澹無暉偃月堂深晝漏稀萬竈貔貅江上老  
兩宮環珮夢中歸內園羯鼓催花發小殿珠簾看雪飛  
不道帳前勅勒舞有人行酒著青衣

湖水春來自綠波空林人跡少經過夜寒石馬嘶風雨  
日落山精泣薜蘿江左長城真自壞鄴中明月竟誰歌

惟餘滿地長弘血草色年深碧更多

送顧仲父赴廣東市舶提舉

合浦明珠久不還使君風采動羣蠻  
鮫人把臂來城裏荔子堆紅出坐間  
江映蕉花鸚鵡綠雨昏榕樹鷓鴣斑  
昔年駿馬經行處父老那知得重攀

題蘇伯修滋溪書堂

華屋書充棟清溪樹拂簷波光浮藻井  
雲影亂牙籤四世風流在諸生禮數嚴  
歸來謝賓客長日下疎簾

題伯修春風亭

青陽動微和，條條原上來。  
綠池解輕冰，芳庭散香埃。  
粲粲桃李花，照耀初日開。  
永懷亭中人，春服宜新裁。

送杜元父赴南臺掾

故國江山在行臺，地望優顧瞻烏亦好。  
却憶鳳曾游寺，隱清溪曉蟬聲玉樹秋。  
郎官多古意，莫上最高樓。

題豫章楊季子水北山房

舊聞楊季子，水北有山房。  
竹色長年綠，松陰五月涼。  
雨

絲深釣渚風帙散書牀亦欲相從去江波不可航

送金溪道士南歸

南州高士芟荷衣賣藥都門盡不知手種溪頭千樹杏  
花開正是到家時

送諸葛子熙關中打碑

漢苑秦宮生綠蕪斷碑殘刻墨模糊應從三峽浮船下  
欲問君家八陣圖

送路吏張蒼麓又別號養晦

循國忠烈王諸孫

寂寞麒麟閣浮沉雁鷺行已聞書上考猶不負前王古  
井宮槐冷空山海檜長歸心似潮水日日向錢塘

送杭州經歷李全初代歸

東家老人語且悲衰年却憶垂髫時王師百萬若過客  
青蓋夜出民不知巷南巷北痴兒女把臂牽衣學番語  
高樓急管酒旗風小院新聲杏花雨比來官長能相憐  
民間蛺蝶飛青錢黃金白壁馱西馬明珠紫貝輸南船  
繁華消歇如翻掌官中賦斂年年長里巷蕭條去不歸

華屋重門結蛛網語中嗚咽不欲聞道旁狼虎方紛紜  
麒麟鳳皇那復得使我益重髯參軍參軍在官近一考  
素髮蕭蕭坐成老上官掣肘下吏罵賴有閭閻獨稱好  
杭州公事天下繁人才處決無留難參軍累官日益貴  
何術可使斯民安

桐花烟為吳國良賦

常聞吳剛上天去手斫嫦娥宮裏樹調向人間作散仙  
陽羨州中水邊住曾見玉兔搗玄霜三生悟得燒墨方

墨成得錢即酤酒那知世有白玉堂百年生計萬慮息  
身不求知名四集卧吹長笛看青天歲掃桐烟三百石  
周郎昔斲長橋蛟腹中有白凝為膏石牀暖傾玉髓滑  
竹屋夜搗山月高江南李墨人共惜安得今人不如昔  
君看鬱鬱歙州山山上青松盡千尺

題顧周道畫濯足圖

脫屣白石上濯足清泉中悠然天際想木末生微風

題高宗二劉妃圖

秋風落盡故宮槐  
江上芙蓉並蒂開  
留得君王不歸去  
鳳皇山下起樓臺

題趙子固蕙花蛺蝶圖

江上青山日欲晡  
幽花小紙墨模糊  
華清宮殿生秋草  
零落滕王蛺蝶圖

題王若水幽禽圖

花間幽鳥愛幽棲  
揀得春風最好枝  
只有江南王若水  
白頭描寫是徐熙



贈歌者杜氏入道

夜涼瑤珮玉丁東  
月下焚香禮碧空  
願逐吹笙王子晉  
並騎丹鳳彩雲中

簾壓濃寒晝掩門  
沉香火暖淡氤氲  
舊時衫子渾無用  
剪作仙家百衲裙

雲髻高梳鬢不分  
掃除虛室事元君  
新糊白紙屏風上  
盡畫蓬萊五色雲

秋日奉陪徵君李先生游華山

輕雲淡秋色涼日靜琳宮水落白石上人行深樹中悠  
悠坐長嘯肅肅來清風仙人不可見芳草碧叢叢

題巾子山房

僧室

清江把禪栖山頂在屋下朝霞生庭戶老樹立石罅日  
出漁舟集日入市賈罷僧子獨何為長年事閒暇

送海東之西省出戍

窮猿憑險弄干戈五月樓船奏凱歌自古蠻夷多反側  
只今州縣重差科漢家循吏丈翁少亮府謀臣馬謖多

莫道鮫人居水底海中曾見不揚波

題劉高州國初運糧文卷後

帝室經營始高州饋餉多猶存數紙在已是百年過  
勲業麒麟閣英雄勅勒歌漢廷功第一只合數蕭何

草堂雅集卷六

欽定四庫全書

草堂雅堂卷七

元 顧瑛 編

鄭東

字季明温州之平陽人幼酷嗜書明春秋後生學  
徒為舉子業者一經指授皆就繩墨作文為詩旨  
趣高遠別有文集行於時今所載者特與予家題  
品者耳

題宋高宗畫扇頭自題云萬木雲深隱連山雨未  
開

多時海上日光催猶道千山雨未開總被浮雲能障斷  
龍沙不見翠華回

題葛仙翁移家圖

多事移家向道塗定從何處覓深居無人占得神仙氣  
乞取青牛背上書

題江貫道平遠圖

飛鳥欲沒暮烟稠  
落落人家竹樹秋  
絕似南徐城上望  
蒼茫野色入揚州

題張戡瘦馬圖

北風蕭蕭沙草黃  
天寒馬瘦骨如牆  
渾家兒女雕鞍上  
日日陰山射白狼

題士宣杏花雙喜

移時山鳥鬬芳叢  
深院佳人晝睡濃  
起立階頭驚碧草  
不緣風雨落春紅

題李唐牧牛圖

羨殺田翁不出村，牛羣坡上散如雲。  
買牛何日同渠牧，短笛時吹向樹根。

懷舊

滄江樓上酒初醒，起視林花落曉星。  
三月到京春雪霽，太行山色馬前青。

送郭彥昭北游

白面郎君好遠游，却從遼海上幽州。  
十日南風行萬里，



牽牛夜夜在牆頭

天妃祠前潮已生  
踏歌搥鼓送郎行  
黑水洋頭好風色  
數過萊州五日程

莫聽謳歌倚柁樓  
令人愁怨憶南州  
一片姑蘇城上月  
送郎直過界河頭

寄郭熙仲魚簡郭彥昭

翼也東吳彥孤標  
玉樹柯政須愁飲少  
且莫倚才多曉  
日開青嶂秋風連  
白波無人相問訊  
小阮近如何

題報本寺

迢遞珠林滄海邊  
參差綠水石渠連  
燈燃方丈開猊座  
屏擁眾愚護法筵  
天女時來花亂下  
龍君欲至風泠然  
金相夜涼遙共禮  
月華長照寶階前

送何謙亨歸撫州

二月離家作候吏  
長江行船興有餘  
文采曾承盧太史  
風猷不墜宋尚書  
豫章寶劍何由得  
東海明珠政不虛  
多時失奉高堂饌  
歸釣寒潭一尺魚

和郭熙仲

每愛揚雄能作賦不憂賈誼易遭讒  
蒼鷹拂拭黃金錠駿馬光明白玉銜  
太乙頻來觀象帙麻姑相許寄銀槭  
獨愧才名難並立見稱龍尾也非凡

寄呈梁承旨

太平天子重詞臣色爛宮袍寵澤新  
應對金鑒明日月步趨玉署上星辰  
夜分執笏傳宣急晝永揮毫草誥頻  
自愧不才頭已白秋風垂釣大江濱

贈墨生魏元德之京

昔年廣陵有魏翁隱居不出玉山中朝汲山下泉暮採  
山上桐手操玉杵不計工一日煮麋三日舂墨成已以  
錦十重色如犀角堅如銅魏郎傳家墨逾好我始得之  
如至寶喜聞學士延閣開驅車欲向都門道為君抱墨  
三歎息虞公目昏揭公老

贈筆生陳重實

吳興老馮善擇毫擇毫入筆銛於刀近年揚陸亦有法

聲價直與馮齊高陳生後出掩三子射利肯作庸工饕  
欣然為我開一束詎疑豕鬣并狸毛纔濡入手即圓熟  
揮洒不覺運腕勞野人得此殊快意翰墨雖拙尤便操  
既不能寫蟲魚疏又不喜書龍虎韜暮年但欲給生筆  
收拾遺史明誅褒顧無好句相報答且復浮以尊中醪  
氣酣耳熱秋風起江山如助詩人豪

九龍山懷友

風雨兩鄉難縮地山窓時讀去年詩九龍何處雲深淺

一雁不來人別離老樹引藤秋結子黃猿窺果晝呼兒  
遙知句就無人解月落山靈墮淚時

題楚江清曉圖

樹碧江寒日出遲青山雲起亦多時幾人船屋綠貪睡  
佳氣朝來竟不知

題朱澤民秋江獨釣圖

山川無微雲萬物繁可數長江秋氣至美人在中渚涼  
風吹蘭舟木葉下如雨魴鯉豈必多書卷良可咀初非

與世殊聊以樂空屢

題張叔厚畫琵琶士女

蝦蟇陵下春風夢潯陽江頭秋月愁莫怪青衫容易濕  
多情司馬雪盈頭

題馮丈仲畫山水

六月涼風吹板扉蒼苔生滿釣魚磯人生抵死貪微祿  
如此溪山不肯歸

題顧定之畫墨竹

眼中得見珊瑚樹無乃佳人碧玉釵酒醒同誰步清影  
不勝白露滿秋階

題王若水畫棘針野雉

雉於翔有煜其章隱而弗見於雉何傷章一雉於止翟翟  
其尾雖離於棘於雉何耻章二雉於雌孰捫爾喙凡民多

言亦孔之疚章三

題從子倫畫梅花家鳧

池上花開如白雲碧波鵝鴨動成羣擬開水檻供垂釣



日日春晴共汝分

題盧尊師三香圖

美服兮繽紛容佩兮氤氲咸告予以穀旦聊容與兮江  
濱爰周顧兮九野忽邂逅兮予昆季佇立以待予廼  
執予手而與言羌齒髮之未化尚偕老兮夫君

題徽廟馬麟梅

龍樓鳳閣美人歌賞盡瓊花碧玉柯驛使去時渾浪折  
江南春色已無多

題范寬小雪山圖

雪壓寒林萬木垂  
經旬不與野人期  
寒驢借得如黃犢  
猶怕山橋不敢騎

題趙翰林桃花馬圖

昔共將軍戰陣間  
髑髏濺血土斑斑  
昆明池上教人洗  
選入天家十二閑

題趙翰林畫馬

大宛前日進龍媒  
屹立天池駿骨開  
黃帕寶鞍纔卸却

鑒與八月上都廻

題管仲姬著色竹圖

賜讌曾陪玉座旁琅玕光彩映椒房  
秋風此日愁無限  
恰與苕溪秋水長

題李唐秋山圖

萬壑霜飛木葉丹石橋流水暮生寒  
却疑二月天台裏  
一路桃花照馬鞍

題趙千里高士圖

題詩日日樹陰傍不斷清風洒石牀  
騎馬出門塵似海  
百年都只為官忙

送郭彥昭歸吳中

江清碧月出東垣良夜開樽修竹園  
天馬何年漢墀下  
爰鷗此日魯城門  
豈求碧海珊瑚樹  
貪看炎州茉莉盆  
定擬重來尋玉局  
容成洞裏與君論

又

外沙沙頭潮沒渚  
海壇廟前唱蠻歛  
政喜南風吹五雨

不愁落日轉櫓烏鰐魚一尺恰上釣吳姬二十獨當壚  
醉歌白雪誰能和擊碎筵中玉唾壺

送日本僧之京

萬里乘桴來絕海中朝冠蓋盡相知丹丘博士與飲酒  
青城先生邀賦詩傳鉢底須歸故國把文遂欲動京師  
絕憐船上看春色二月官河水發時

送駙馬西山公詩

明侯德美世莫儔麒麟之趾丹鳳味黃流芬芳在尊卣

繅藉光彩收琳球王姬下嫁禮服優鍤金為車白玉軸  
閨中通籍孰與侔貴宜列爵同徹侯大布遂易狐白裘  
事業直擬追前修賦詩援筆思不留天機豈用加雕鏤  
衆觀后昇親射侯束手欲立江輒流法書一字千金酬  
玉釵之股珊瑚鈎大儒老師日與游論道極口稱伊周  
二年市官留小州政寬坐致東南酋三韓毛人及琉球  
行滕在股寶絡頭長風萬里驅大艘象犀珠貝充海陬  
貢之府庫常汗牛歸視其室唯蒹葭聖王在位將爾求

出入王命為舌喉

題畫山水歌

君不見謝康樂短面長髯瘦如鶴作郡安能棄丘壑又  
不見鴟夷子屬鎮飛霜赤心死一棹三江入烟雨我生  
千載下酷愛古人心本野老仙縮地誰得傳顛墨淋漓  
醉中洒幽幽樹意含暝雨朶朶山頭青欲雲橫江依約  
度深谷三里五里東西鄰采芝定有商顏叟擗皮之裘  
擗葉裙神仙有無不可即杳杳路斷桃花津何人相期

過西麓牲肥酒熟秋樂神祇知耕鋤及婚嫁廟堂黜陟  
那得聞扁舟從何來盈盈載秋碧嵐光忽已冷日暮問  
家室熒熒林隙燈火青雞黍家人具今夕終南相繼售  
卑價才薄官微遭箠罵久知富貴成茹荼吾獨愛山如  
食蔗家貧恰有買屐錢白髮漁郎許借船箕山賴曲命  
吾駕百歲胡為墮機獲

題王若水梨花山鵲圖

庭北梨花爛漫開一雙山鵲忽飛來人生有幾清明節



日日春風醉百迴

李元珪

字廷璧河東人端厚沉毅重然諾酷志讀書非其人不苟與交書法如困學凡所寄詩章多為好事者持去故所載不多云

感懷

異方久漂泊歲晚羈吳門感慨俯流水悠悠度朝昏荆璞獻所知懷寶非有恩達人一傾顧至道千古存富貴

易追逐安能效塵奔世態日已薄憂心向誰論

一日復一日

一日一日復一日百歲能消幾雙屐玉龍嘶斷東溟波  
春風吹老南山石柳花著水流青萍琅玕弄影生秋聲  
霓裳短衣尚堪舞鬪髯醜眼不再明竹馬兒童誇疾走  
檀板梨園歌白首桑根陵谷號飢孤一夜黃河向西吼  
芒碭山下赤龍子千古英雄魂不死崆峒重揖廣成公  
笑我攜來亂紅紫羲和盡意驅長雲有酒誰酌田文君

燕雀紛紛戲鴻鵠古人道義今無聞東家嬌娥怯春老  
曉鏡畫眉鬪新巧開屏自語芙蓉秋妾顏不似當時好一  
朝一朝又一朝黃塵車馬長安橋麗衣藿食養心骨會  
看鵬背摩青霄

題梅花士女

夢裏尋香出曉城一聲殘角暗魂驚美人不作羅浮夢  
獨倚梅花看月明

秋暮

秋色已云暮天寒未授衣異鄉三載過倦客幾時歸交  
漆唯君久論心見面稀題詩寄清隱江國雁初飛

送趙季文之湖州知事

芙蓉幕裏舊參軍文采風流思不羣執法憲庭名久著  
分符水部政多聞今朝別酒聽吳曲後夜輕帆卸雪雲  
咫尺相思相憶處一琴一鶴獨隨君

春日訪雲林隱君倪元鎮

往歲慕幽隱茲晨適雲林倒屣荷主意下榻情何深取

琴為我彈唐虞有遺音感子曠達志滌我塵煩襟雨過  
池草生窓虛松竹陰倚檻俯流水開軒聽鳴琴芳春集  
嘉讌酒至還自斟愛客畏言別維舟睇遙岑

南昌諸郎立春次日邀飲江閣

置酒宴江閣濟濟皆郎官素心偶相愜氣味如芝蘭東  
風奏微和晴雲靄林端美人歌白雪玉筯行春盤焉知  
千里客共此一日歡夕陽下西麓徘徊更凭闌

冬日平江寄倪元鎮

金匱山房詩集 卷七  
玄文館裏逢君日剪燭傳杯夜話時寒月半窓親下榻  
幽人滿坐共吟詩無兒守舍馮唐老有客分金鮑叔知  
咫尺維舟空悵望封題聊為寄相思

雨中夜宿瓜洲江浦

春陰江浦易黃昏雨裏人家早閉門歸雁雲間知塞路  
過帆沙觜帶潮痕遙瞻北固青山郭只隔南淮綠水村  
野寺疎鐘到孤枕閒愁清夜與誰論

秋暮夜宿望亭

茅屋沿堤密掩扉官橋昏黑泊船稀  
守關戍火明村塢隔岸魚燈照石磯  
寒木盡隨溪雨落斷鴻猶趁野雲飛  
蓬窓歌枕渾無寐倦聽人家夜搗衣

贈伊遜秘書載書歸文翁石室

一燈夢覺青藜杖長揖芸臺入四川  
載書深藏石室裏卜居還近草堂邊  
蜀臣漢士明日月文翁武侯相後先  
江上揚帆歸萬里幽花野草鎮經年

梁溪春暮寄范德原

三月梁溪上徘徊憶故人客留山館雨花落野橋春  
我無兒子憐君有老親何時相對榻重與話酸辛

梁溪留別虞彥高

野人情曠達志不在輕肥夜雨三更夢春江一棹歸  
神駒難並駕鷺鳥不羣飛老去纔聞道吾生漸覺非

客海陵光孝寺秋深感懷二首簡盛克明

海陵蕭寺裏獨客感秋深只有君知己更無人聽琴  
鵲天共影促織夜偏吟回首南塘路凋殘楓樹林



孤燈照無寐飄泊寄僧房  
蕙草零秋露莎雞啼夜牆  
愁來嗟伯道老去憶馮唐  
曉把青銅鏡生憎鬢底霜

次韻游虎丘

寶剎近城郭峰從海湧來  
千人盤石側絕壁劍池開  
聞道吳王塚今為釋氏臺  
古碑題木客陳迹幾風埃

題文湖州湘中推蓬圖

岳王樓前湖水邊  
離歌驚覺鷓鴣眠  
生綃一幅秋雲亂  
又上江南客子船

江行春暮

江岸薔薇也自紅  
可憐夜雨落花聚  
不如燕子知人意  
箇箇飛來近短篷

白鷗

幾箇白鷗真可愛  
碧波蕩漾即為家  
春江正喜中流急  
又趁潮頭過淺沙

張渥

字叔厚博學明經  
累舉不得志於有司  
放意為詩

章時用李龍眠法作白描前無古人雖達顯人不能以力致之

題所翁畫龍

我聞真龍神變化呼吸風雲齊上下胡為却向九淵潛  
頷下驪珠光不夜一朝帝勅鞭雷霆秘怪恍惚無逃形  
蜿蜒千丈露頭角顛倒山岳翻滄溟乾坤瀕洞日為黑  
元氣淋漓收不得願將點滴試天瓢草木晴光甦下國  
龍兮龍兮汝為龍攀之不見追無蹤何當飛空附其尾

手接鴻濛究元始

題金碧仙山圖

丹崖翠壁五雲間  
此是蓬萊第一山  
笑指碧桃花發處  
玉鸞曾載月中還

題明雪窓蘭

援琴誰歎生空谷  
結佩應憐感逐臣  
九畹斷魂招不得  
墨花夜泣楚江春

題百禽噪虎圖

短草空山怒養威百禽驚噪向斜暉寢皮食肉堪憐處  
且喜將軍出獵稀

題書扇

一自蘭亭飛筆後昭陵風雨夜如何當年老嫗能知此  
扇出人間百價過

題王元章梅

照水疎花冰有暈橫窓瘦影玉無痕孤山月冷黃昏後  
拄杖曾敲處士門

題趙翰林墨蘭

白鷗波點研池清楚  
晚香風筆底生  
記得弁峰春雨後  
撥雲移種向南榮

題昭君出塞圖

黃沙漫海幽雲高  
燕山雪凍春不毛  
其人生長猗如梟  
氈處肉食膽氣豪  
角弓羽箭花紋刀  
踴躍快馬騰飛猱  
玄旗樹日驚霜飈  
云是使者來漢朝  
漢宮佳人顏色嬌  
蛾眉顚頰髮無膏  
手揮琵琶響檀槽  
聲鳴咽寫鬱陶

穹廬不暖鄉夢勞邊月長照非良宵天寒賜著灰色貂  
雙壺灩灩傾蒲桃金門玉殿心旌搖長安烟水空迢遙  
穹廬蹋歌嗾犬焚自憐耳絕聞蕭韶畫工受賂死莫逃  
筆底妍醜移分毫掖庭舊好恩不交在北雖恨寵可要  
和蕃計失令之驕干戈萬里紛擲跳廟堂老將蜀錦袍  
玉帳坐爵麾赤旄兜離碧眼滿近郊鳳凰之穴蟠蛇蛟  
北風動地吹黃茅獨留青塚狐狸號流魂千載誰能招  
嗚呼流魂千載誰能招

題了堂上人鍊雪軒

雪消成水固非異，煮水作雪真為奇。  
吾師悟此煎茶法，掬泉敲火須臨時。  
手搏清風弄明月，幻作一同滋味別。  
試看椀面乳浮花，濁惱消除置冰鏡。  
君不見達摩面壁雪山中，至今直指傳宗風。  
又不見玉川先生洛城裏，軍將叩門日高起。  
何似松風堂上人，不譚九轉丹有神嗽瓊。  
燕玉詩清新華池肥水常津津。

李瓚



字子粲姑蘇人幼從元明余先生游資性曠達多  
才能讀書作文之暇旁通浮屠并漆園氏學凡有  
品題若不經意而穎脫過人與余友善故所寄尤  
多焉

仙韶曲

九天宮闕五雲西金門曉闌干宮齊雲韶仙侶奏天樂  
聖王南面方無為八音克諧八佾舞風傳龍管雷鳴鼓  
至和薰蒸大樂舉羣生萌芽萬物覩聖人立極四海清

咸英韶濩皆同聲億萬斯年垂鴻名

遣興

客舍沙南蒲子岡  
流光愁思共微茫  
疎林翠竹含溪影  
小樹紅梅播楚芳  
解樂師裏方入海  
乘舟張翰謾歸鄉  
不如却學南山牧  
叩角浩歌清夜長

因願陋隱寄上清外史薛玄卿

仙人薛外史  
高隱在幽閒  
碧雲上清境  
浩月瓊林壇  
博雅坐虛室  
飛神修大丹  
彈琴松樹裏  
吹簫清夜間  
幾時

訪山館相與遊三山

立春奉寄海虞山人繆仲德十韻

歲星司淑氣天造立王春草出金茸細梅開玉蕊新三  
陽仍及泰萬象始維屯綵勝皆題句金花亦記辰至音  
聞木甲厚味列盤辛江海恩波濶山川化日醇明時調  
玉燭聖德降絲綸之子當全盛行歌就隱淪舉觴空顧  
影伐木獨懷人輾轉不能寢題詩慰所親

春夜集諸奕友

海濱初春夜寥間高林蕭條羣籟寂蕭蕭微風吹繡衣  
悠悠明月生歌席諸君才氣何卓犖專心能繼奕秋學  
旗壘還如事攻掠黑白昭然見強弱清宵玉漏何遲遲  
笙歌滿座傾金卮坐中賓客亦皆醉霜落西樓烏夜啼

春原

林樾風初協村原泥正融香蕪連楚碧冶杏過牆紅塞  
鴈歸天末已鶯出谷中春光濃若酒歡賞興何窮

春初奉寄海虞山北聲九皋上人

杖錫虞山北春風憶舊游翠崖雲每集丹壑水爭流染  
翰超懷素哦詩繼惠休何當上湖夜相與泛扁舟

柳枝詞

吳江綠水生春明江上柳枝今漸青  
烏啞啞中夜鳴  
愁絕東風長短亭柳枝當戶森成束  
思婦正倚闌干曲  
別情有恨不可解萬里相思淚盈掬  
愁多不織流黃機  
織得回文更慘悽功名悞人不足恃  
藁砧藁砧何日歸  
春夜懷豫章倪中豈并太原王本中二子皆客京

師故詩及之

耿耿春夜永迢迢更漏殘美人隔千里清月在江關舉  
栝不能樂援琴孰為歡悵望五雲外目送雙飛翰王子  
經緯學紬繹茫無端倪生富文史落筆回狂瀾古劍沒  
豐城太璞昧荆山奇材每不識萬古一長歎而我困畎  
畝漂流吳楚間釜魚獨恒飢衣鶉每懷單慷慨念二子  
頻年事征鞍庶幾抱瑟心不愧齋門彈

題倪元鎮聽松樓

昔者貞白隋梁間躬行道德謝塵累隱居獨在華陽山  
好聽松聲白雲外冷然虛籟何蕭蕭刁刁清聲雜調調  
宛如王母搖玉珮想象子晉吹笙簫我亦從來愛幽險  
羨子結構尤高遠巧言如簧獨不聞絕愛蒼髯鳴翠巘  
春林夜起颼颼聲天風海濤來青冥幾時相過一洗耳  
醉中同躡鳳凰翎

春草曲

春風百草生何許伊沅之洲澧之浦荃蘅蘭蕙與芳杜

馨香采色紛無數  
鵲鳩先鳴衆芳舉  
萬綠如烟花欲語  
王孫游子去湘楚  
蘼蕪開謝山之阻  
春草無情情獨苦  
別離恨深乃終古  
春草生淚如雨

江浦送別

協風吹永津  
水色微茫綠沙融  
文禽集波暖  
白鷗浴之  
子逝將別  
分手愁局促  
離觴一何頻  
征舸嗟去速  
今日江浦東  
明朝闕山北  
棹歌不堪聞  
淒然淚盈掬

歸鴻曲



高秋鴻雁來仲春鴻雁歸關河道路遠沙場聲韻悲去年曾寄帛書去回文織就相思句橐砧遠在邊城戍高樓不見絕心緒愁多別久淚闌干何日歸來再合歡一聽歸鴻一生怨揚子江南春雨寒

欲雨

大堊積層陰油雲閣時雨蜉蝣出陰暄商羊頻自舞夕月離於畢土氣潤於礎及春望滂沱萬物盡興覩

關河柳

關河春初官柳青上有栖鳥啞啞鳴千樹萬樹恨如織  
水遠山長無限情柳絲忽換黃金色當時憶送游俠客  
去年驚心揚子南今年又恨沙場北關河柳枝管別離  
離人一去何時歸折枝千里寄相思

上魚訪監司圖魯公

聖主今堯舜賢臣昔禹皋風雲千里迥日月九重高宰  
執仍銓注明公實俊髦上憂分閫轄威令樹旗旄叅贊  
安藩翰論思並畧韜為邦過魏邠論事失蕭曹遠道驂

騶迅長天鵬鴉翔浙河清泚泚風俗樂囂囂力穡甘耕  
耨條桑各繹繹人沾施澤惠國著秉鈞勞憲將俄優擢  
王言極寵褒豈官方就列鷹鉞忽辭繇繇契當朝著夢  
龍千載遭幸生交泰日下士荷甄陶

滄浪亭

蘇公昔在宋盛時文采才名動天地暮年築居向滄浪  
草聖相傳世尤貴積書為林墨為池長歌散髮鬢如絲  
風流百歲不泯滅及此士論無磷緇憶昔嘗為吳下客

刺船携酒訪陳迹却思重游不可得臨風悽然念疇昔  
遣興

遲遲當麗日冉冉及陽春草色連烟翠柳條垂麴塵哦  
詩紅杏館漉酒白綸巾欲寫江淹賦悽然寄遠人

鬢絲行

君不見少年雙鬢如青絲骨格磊砢凌雲姿金鞍玉勒  
五陵道桓桓意氣不可羈功名未成淹歲月短影蕭條  
如白雪忽然不知老將至滿目塵埃仍汨沒人生百年

寧有待富貴功名豈長在何如日飲金尊酒醉學山公  
歸倒載

淇綠堂緋桃

淇綠春方麗緋桃滿樹枝繁香何冉冉穠華獨離離冶  
杏皆慙落殘梅只謾披擬携浮蟻酒與客醉金卮

雉朝飛

仲春風日生淑氣畦麥青青與天際一飲一啄性所同  
時哉時哉雙飛雉雄唱于前神不驚彼雌隨後相和鳴

雄雌顧盼各得意牧犢對此能無情人倫久廢禮義缺  
夫婦恩情易懸絕千年惟有杞梁妻生則異室死同穴

擊楫行

日華悠悠江色清碧波萬里生春明商婦琵琶別怨生  
擊楫渡江舟正行美人美人既無情澧蘭沅芷揚芳馨  
欲見不見心怵怵輕風吹羅裳擊楫且勿忙恐驚菰蒲  
中交頸雙鴛鴦莫學桃根與桃葉渡江一去音信絕江  
上春來復春去對此流光淚盈睫

牡丹一章奉寄玉山公子

巷南亭館春風樹魏紫姚黃取次開翠羽當窓林影麗  
紅雲繞坐國香來凝酥暖汎金壺釀羣玉晴籠錦障埃  
洧外何能夸芍藥番禺自足愧玫瑰竟湏高宴煩燕女  
左手持花右酒栝

暮春三絕句

水生澤國徂春暮倚杖汀洲立惠風千樹桃花紅雨落  
滿林竹笋綠陰濃

牡丹滿檻紅於錦  
柳絮隨風白勝絲  
何日扁舟釣湖上  
滄波深處一絲烟

屈宋文章冠天下  
才華名譽本源流  
後人曷足能窺測  
權變經常乃不求

戴勝吟

江隼春暖桑盈野  
三農耦耕蠶事舉  
嗟爾戴勝胡為來  
乃有鳴聲驚織婦  
戴勝來降於桑采  
麗羽何清揚  
天時月令仍相當  
茲禽一鳴穀雨至  
農人聞之興耜蠶



成繅絲袂及時

種葵

種葵南軒下葵長不盈尺  
芄芄初葉茂挺挺交柯直  
匪以花為美有取心向日  
孤忠類臣子恒性若有德  
只恐秋風至蘭蕙同蕭瑟  
雖然遇彫落凡草孰可匹

柳花

澤國春餘江樹盡柳花無  
數沒鳬翁每當白日飛晴  
雪似與游絲逐惠風灞上  
啼鶯孤驛外隋堤歸馬夕  
陽中

離人欲折還驚歎空對柔條恨不窮

袁南宮江西歸吳門隱居短句奉寄

江國徂春暮蘭苔生惠風佳人天之末高隱林泉中有  
懷不能伸愁思渺無窮朱絃發清響大雅振黃鍾依依  
閭門抑去去塞北鴻永言寄歌詩用以慰幽悵

搏熊婦

關西幼婦如花容乃有猛力能搏熊徒手搏熊熊力窮  
神色不變如英雄嗟熊之力猛於虎初若恃強欺幼婦

一市見之皆為驚玉腕朱顏那好武君不聞昔之猛虎  
嘗負嵎馮婦攘臂而下車千秋萬古稱善士嗟婦固與  
常人殊

上崑山知州王世傑

中原多異氣盛世產賢能事業人恒慕才華世所稱朝  
廷方海納名譽翕雲興謹議驚僚屬雄文播友朋為州  
宗敬義下令不驕矜舊染還思革仁聲信有憑明時當  
舉用善教任宣承梗治民俄變並緣吏所懲龔黃政教

美杜名德音弘聖主方前席行當瞻日昇

芍藥

惠風吹芍藥爛漫亞雕闌綠葉生春末紅葩榮榦端  
穠桃空媿椒冶杏亦凋殘准擬携壺酒開軒醉玉顏

春半

水國春將半叢篁映白沙簷楹皆燕雀徑街接桑麻吟  
嘯分江色登臨愛日華何當學鄭子谷口問山家

草堂雅集卷七